

REGLUGERÐ

um árstíðabundið verðmiðlunargjald af verði mjólkur til framleiðenda.

1. gr.

Innheimta skal árstíðabundið verðmiðlunargjald af verði sumarmjólkur til framleiðanda. Tekjum af gjaldinu skal varið til að greiða framleiðendum álag á grundvallarverð vetrarmjólkur. Gjald þetta skal ekki hafa áhrif á útsöluverð mjólkur til neytenda.

2. gr.

Sé landinu skipt í mjólkursöluvæði samkvæmt ákvæðum 45. gr. l. nr. 46/1985 er Framleiðsluráði heimilt að fela stjórn hvers svæðis innheimtu og endurgreiðslu gjaldsins. Er skylt að halda sérstakt bókhald um gjaldið og halda fjárreiðum þess aðgreindum frá öðrum rekstri. Hafi landinu ekki verið skipt í sölusvæði fer Framleiðsluráð landbúnaðarins með innheimtu og endurgreiðslu gjaldsins samkvæmt ákvæðum þessarar reglugerðar.

3. gr.

Innheimta og greiðsla gjaldsins getur farið fram með tvennum hætti. Annars vegar með því að láta greiðslu þess fara fram samhliða innheimtu, sbr. a-lið þessarar greinar og hins vegar með því að greiða það jafnóðum og vetrarmjólk fellur til, sbr. b-lið þessarar greinar. Gjaldið skal reiknað af grundvallarverði mjólkur sem verðlagsnefnd búvöru ákveður á hverjum tíma.

a) Sé heimilað að greiða gjaldið samhliða því að það er innheimt, skal það sem innheimt er vera að lágmarki 7,5% af grundvallarverði innveginnar mjólkur í afurðastöð í maímánuði og 12,0% í mánuðunum júní og júlí. Ekkert gjald má reikna í öðrum mánuðum ársins. Telji stjórn samsöluvæðis nauðsyn bera til að hafa verðtilfærslu meiri og/eða að innheimta skuli gjaldið í ágústmánuði í stað maímánaðar, skal hún leita eftir heimild fyrir því hjá landbúnaðarráðherra. Aldrei skal leyfð hærri gjaldtaka en 15% af grundvallarverði.

b) Sé heimilað að greiða hverjum framleiðanda álag á innvegna mjólk á fyrri hluta verðlagsársins þrátt fyrir að innheimta verðmiðlunargjalds hafi ekki farið fram, skal gjaldið vera föst prósentu af grundvallarverði til bænda þá mánuði sem það greiðist til framleiðenda. Álagið má aldrei vera hærra en svo að það innheimtist með að hámarki 15% gjaldi á grundvallarverð innveginnar mjólkur, sbr. 5. gr. í mánuðunum maí, júní og júlí. Það sem á kann að vanta til greiðslu álags að loknu þessu tímabili skal innheimt af grundvallarverði mjólkur sem innvegin er í ágústmánuði. Skal innheimt gjald taka sömu breytingum og grundvallarverð mjólkur.

Beiðni um greiðslufyrirkomulag skal hafa borist landbúnaðarráðherra eigi síðar en 1. september á því verðlagsári sem gjaldtakan fer fram. Ber þeim aðila sem heimildina fær þegar að tilkynna hana framleiðendum innan viðkomandi mjólkursöluvæðis.

4. gr.

Verðmiðlunargjald skal greiða framleiðendum sem álag á innvegna mjólk í mánuðunum nóvember–febrúar. Fari stjórn söluvæðis með endurgreiðslu gjaldsins er henni heimilt, að fenginni staðfestingu landbúnaðarráðherra, að láta endurgreiðsluna ná einnig til mjólkur sem er framleidd í októbermánuði. Umsókn þar um skal hafa borist landbúnaðarráðherra eigi síðar en 1. september á því verðlagsári sem um ræðir.

5. gr.

Verðmiðlunargjald samkvæmt þessari reglugerð skal innheimt af framleiðendum samtímis því að greiðsla mjólkur fer fram sem gjald er tekið af samkvæmt 3. gr. Liggi fyrir samningur milli ríkisstjórnarinnar og Stéttarsambands bænda um magn mjólkur sem hverjum framleiðanda er tryggt fullt verð fyrir, skal verðmiðlunargjald aðeins tekið af því magni mjólkur sem er með verðábyrgð hjá hverjum og einum fyrir sig í þeim mánuði er um ræðir. Hafi áður nefndur samningur ekki verið gerður skal gjald tekið af allri innveginni mjólk í mánuðinum.

6. gr.

Fari innheimta og endurgreiðsla verðmiðlunargjaldsins fram skv. a-lið 3. gr. skal deila innheimtu gjaldi í hverjum mánuði á allt það magn vetrarmjólkur sem greiðast skal með álagi. Það álag sem þannig er fundið á lítra mjólkur skal greiða framleiðendum eigi síðar en með greiðslu fyrir mjólk innvegna í mánuðinum þar á eftir.

Sá aðili sem fer með innheimtu og endurgreiðslu gjaldsins skal við upphaf verðlagsárs gera áætlun um hversu mikið muni innheimtast af sumarmjólk og hversu hátt álag kunni að koma á verð vetrarmjólkur og kynna hana framleiðendum á svæðinu.

7. gr.

Fari innheimta og endurgreiðsla verðmiðlunargjaldsins fram skv. b-lið 3. gr. og skal greiða álag á grundvallarverð mjólkur, allt að 8,5% ef greitt er fyrir mánuðina nóvember–febrúar, en hlutfallslega lægra ef einnig er greitt álag á októbermjólk, sbr. 4. gr.

Sá aðili sem fer með endurgreiðslu gjaldsins tilkynnir framleiðendum á svæðinu um fyrirkomulag álagsgreiðslna í byrjun verðlagsársins.

8. gr.

Rísi ágreiningur um gjaldskyldu eða önnur atriði er varða reglugerð þessa, sker landbúnaðarráðherra úr þeim ágreiningi.

9. gr.

Brot á ákvæðum þessarar reglugerðar varða refsingu skv. 59. gr. l. nr. 46 27. júní 1985.

10. gr.

Reglugerð þessi er sett samkvæmt 22. gr. l. nr. 46. 27. júní 1985 um framleiðslu, verðlagningu og sölu á búvörum, til þess að öðlast þegar gildi og birtist til eftirbreytni öllum þeim sem hlut eiga að máli. Jafnframt er úr gildi felld reglugerð um sama efni nr. 277 6. júní 1986.

Ákvæði til bráðabirgða.

Á verðlagsárinu 1989–1990 skal greiða álag á vetrarmjólk í mánuðunum nóvember–febrúar, 8,5% á grundvallarverð mjólkur. Heimilt er stjórn mjólkursölu svæðis að endurgreiða til viðbótar skv. a-lið 3. gr. þar sem mikill munur er á innvigtun milli veturs og sumars.

Landbúnaðarráðuneytið, 18. desember 1989.

Steingrímur J. Sigfússon.

Jón Höskuldsson.